

# Risguardau las directivas e cundiziuns

Las lavurs vid la via da meglieraziun a Mustér/Disla vegnan cuntinuadas tenor plan

DA HANS HUONDER/FMR

■ **Las lavurs exequidas entochen uss el rom dil project da meglieraziun vid la via historica da Disla ein succedidas tenor il project approbau. Aschia pon ellas vegnir cuntinuadas ussa, risguardond la mutada historica dil tschancun.** «Las davosas jamnas ein las lavurs dalla meglieraziun generala da Mustér vid la via campestra denter Disla e Madernal a Mustér vegnidas criticadas publicamein. Cun occasiun d'in'uatga entras igl Uffeci d'agricultura e geoinformaziun dil cantun Grischun ensemen culla patruna da construcziun sco era culs posts specialisai cumpetents dalla confederaziun e dil cantun eis ei vegniu constatà che las lavurs vegnan exequidas tenor il project approbau giuridicamein valeivel ed observond tuttas cundiziuns. Aschia pon las lavurs da construcziun vegnir cuntinuadas sco planisau», scriva igl uffeci d'agricultura e geoinformaziun en ina comunicaziun allas medias. Il president dalla meglieraziun da Mustér, *Walter Deplazes* da Surrein, ei satisfatg dallas constataziuns dils uffeci: «Nus havein fatg tut tenor il project approbau ed jeu sundel cuntents ch'ils uffeci vesan era quei aschia. Las lavurs vegnan cuntinuadas ton pli spert.» La meinafatschenta dalla Protecziun dalla patria dil Grischun, *Ludmila Seifert*, ha buca priu posiziun enviers las informaziuns ch'ei vegnidas tarmessas dil cantun allas medias: «Nus havein tschentau ina damonda da revisiun dil project al Departament d'economia publica e fatsg socials dil cantun, mo havein aunc retschert negina risposta sin quella. Consequentamein enconuschin nus era buc ils motivs daco che las lavurs duessen vegnir cuntinuadas.»



■ **Il mirs schetgs dalla via historica duein vegnir manteni.**

FOTO HANS HUONDER

## Cundiziuns voluminusas

En connex culla meglieraziun generala che succeda dapresent a Mustér vegn la via da comunicaziun historica denter Disla e Madernal slargada, aschia ch'ella sa vegnir nezegiada egl avegnir per intents agricols. Enten exequir quellavurs ha ei denton era num da risguardar elements prezios sco mirs schetgs e seivs vivas che van per part en decadenza. Aschia eis ei pusseivel da mantener il maletg el liug, salvond la substanzia architectonica historica. En quei connex ein era las cundiziuns persunter vegnidas formuladas el project dils 16 d'avrel 2018. L'entschatta uost han pliras personas privatas ed organisaziuns critica la renovaziun dalla via. Cun agid da fotos ei vegniu fatg valer ch'ei seigi vegniu cunterfatg a cundiziuns essenzialas dil project approbau e ch'ei maunchi il quitaun necessari per proteger ils elements dalla via da comunicaziun historica.

## Lavurs corrispundan al project

Per sclarir eventualas malcapientschas ei vegniu arranschau in'uatga sil plazal culs gremis pertuccai. «Igl ei semussau ch'il tschancun dalla via en discussiun ei insumma aunc buca vegniu tanguas dallas lavurs», scriva igl uffeci. Las lavurs eran interruttas per motivs da vacanzas dallas interpresas. Ils 17 d'ost 2020 – aunc avon che las lavurs da construcziun vegnien reprimas – ha in'ulteriura uatga cun tutt ils posts specialisai cumpetents sin plaun cantunal e federal giu liug. «En quei connex eis ei vegniu constatà che las lavur ein vegnidas exequidas entochen ussa tenor il project approbau e tenor las cundiziuns fetg detagliadas ch'ei cuntenidas en quell'approbau. Il proceder planisau per mantener ils mirs schetgs corrispunda al project approbau», constatessa igl uffeci. Per quei motiv vegnan las mesiras planisadas accumpignadas

stretgmain dalla Tgira da monuments cantunala, digl accumpignament ecologic da construcziun, dalla direcziun dil project e digl uffeci per agricultura e geoinformaziun. Igl Uffeci federal da vias ch'ei responsabels per las vias da comunicaziun historicas vegn medemamain involviu ella realizaziun. «La patruna da construcziun e las autoritads ein fetg cunscientas dall'impurtonza dalla via e realiseschan il project cul quitaun dui», scriva igl uffeci. Sin fundament da quella constataziun ed en cunvegientscha culla delegaziun dallas representantas e dils representants dalla confederaziun e dil cantun ei igl uffeci d'agricultura e geoinformaziun vegniu alla conclusiun ch'ei drova neginas mesiras da correctura e che las lavurs san vegnir cuntinuadas tenor plan e sco previu el project approbau e tenor las cundiziuns ch'ei cuntenidas en quell'approbau.

## ALPINISSEM

### Accident mortal el Valleis

(srf/rtr/fmr) El Valleis ein dus alpinists se-disgraziati la sonda al Weisshorn. In guid da muntogna dil Grischun e siu accumpignader (38) dil cantun Berna ein curdai sin in'altezia da 4300 meters sur mar ver 500 meters ella profunditad. Tiel guid da muntogna setracta ei d'in um da Breil da 57 onns. Tenor la polizia cantunala dil Valleis eran ils dus alpinists da viadi naven dil Schaljochbiwak en direcziun Schaligrat. Ei havevien previu da far ina tura naven dil Schaligrat sil Weisshorn. Sunter ch'ils confamiliars dils dus alpinists han buca contonschiu il suentermezi el han ei alarmau las forzas da salvament. Sunter plirs sgols da tscherca han las forzas da salvament anflau ils dus umens se-disgraziati sin rodond 3800 meters sur mar.

## GLION

### S'annunziar pil podi da catscha

(fmr/cp) L'Uniu purila grischuna envia gliendisdis, ils 31 d'ost 2020 allas 20.00 ad ina sera d'informaziun davart la lescha da catscha. Cul moderatur *Norbert Waser* separticipeschan al podi cusseglert dils cantuns *Stefan Engler*, *Martin Renner* e *Robert Brunold*. Il referat fa *Adrian Arquint*, menader digl Uffeci da catscha grischun. Las relaziuns da plazs ell'aula dalla casa da scola a Glion ein limitadas pervia dil coronavirus Perquei eis ei necessari da s'annunziar pil podi. Tochen gievgia, ils 27-8-2020 san ins s'annunziar per quell'occurrnza cun tarmetter in mail a: [casutt@buendnerbauernverband.ch](mailto:casutt@buendnerbauernverband.ch)

# Elecziuns da cumbat a Domat

Tschun candidats per las quater sutgas en suprastanza

DA CLAUDIO WILLI

■ **Pervia dalla pandemia han las elecziuns communalas a Domat stuiu vegnir spustadas dalla primavera sils 27 da settember. Ferton che la reelecziun dil president communal ei nundispetivla datti in cumbat per ils quater mandats ella suprastanza communal.** Quei che pertucca il presidi communal ei la PCD ella situaziun confortabla da saver presentar cun *Erich Kohler* in candidat nundispetivel per la reelecziun. Avon quater onns er'ei reussiu alla PCD da reacquistar il presidi dalla vischnaunca dominada dalla PCD. Ils davos 17 onns era il presidi numnadamein staus els mauns dil liberal *Peter Wettstein* (1999–2007) e dalla socialdemocrata *Beatrice Baselgia* (2007–2016). La PCD selegrì da saver

presentar *Erich Kohler* per ina reelecziun: Il parsura *Kohler* hagi mess en sia emprema perioda d'uffeci impurtonts accents, ha il president dalla PCD *Patrick Bargetzi* puntuau alla radunonza da nominaziun. Sin sia pagina d'internet eis el sepresentaus sco politicher, convischin da Domat e realisatur. *Kohler* ei era president dalla Regiun dil Plaun ed ei vegniu eligius 2018 sco deputau dil cumin da Razén el cussegl grond, quei che documentschi la reconuschientscha da siu engaschament politic.

## Elecziuns da cumbat

Per las elecziuns dalla suprastanza communal vegn ei a dar in cumbat damai che tschun candidatas ni candidats aspieschan per ils quater mandats disponibils. Cun *Armin Tanner* (PCD), *Silvia Bisculm Jörg* (PS) e *Georg Ragaz* (in-

dependent) semettan treis mandataris en uffeci a disposiziun per ina reelecziun. *Armin Tanner* ha sco cau dil departament da construcziun aulta e stabiliments publics gidau a formar essenzialme in svilup dil vitg dils davos ogt onns, denter auter cun impurtonts stabiliments da scola e cun la casa communal.

Medemamein sa la PS sebasar cun *Silvia Bisculm Jörg*, la scheffa dil departament per cultura, socialesser e polizia, sin ina valur segira. Sper il predicat (entochen dacheu) sa *Bisculm Jörg* ir el cumbat electoral cun il sustegn d'ina partida activa. Avon sia elecziun ella suprastanza communal eis ella stada siat onns commembra dil parlament communal ch'ella ha presidiau igl onn 2013 sco «pli aulta vischina da Domat». La psicoterapeuta e mumma da treis affons

vegli s'engaschar per in vitg «modern, tolerant e progressiv», san ins leger ella comunicaziun da presisa. Sin basa circuitala ei *Bisculm Jörg* vegnida tscharnida sco suppleanta da deputada dil cumin da Razén.

Cun la tezla «entochen dacheu» ed in vast attestat d'activitads sa era *Georg Ragaz* ir el cumbat electoral. Il cau dil departament ambient e construcziun bassa ha giu da tarschinar in vast camp d'acziun cullas vias forestalas e cun l'Alp Ranasca ha el giu d'ademplier in interessant penum.

Avon quater onns era *Ragaz* vegniu eligius en suprastanza communal sco representant engaschau dalla PBD, acquistond aschia per l'emprema gada per quella partida ina sutga ell'executiva communal. Daferton ha *Ragaz* denton bandunau la partida e

politisescha da niev sut il predicat «independent».

## Departament da scola vacant

Il quart post en la suprastanza communal ei daventaus vacants perquei che *Gabriela Aschwanden*, la menadra dil departament da scola, ch'ei era seprofilada en damondas da formaziun sin plaun surregional, sa buca semetter a disposiziun pli pervia dalla limitaziun dil temps d'uffeci. Ei seigi perquei facticamein in cletg special, selegra il president dalla PCD, ch'ei seigi reussiu da gudignar cun *Nesina Ackermann-Gartmann* (39) in'excelenta candidata. Da professiun eis ella scolasta secundara, ha instruiu alla scola romontscha «Scolaviva» a Laax nua ch'ella ei era stada menadra da scola entochen igl onn 2019. La PCD sappi pia presentar ina candidata

che corrispundi al profil per il departament da scola.

Medemamein el cumbat electoral va *Daniel Meyer* (33) per la PPS. *Meyer* appartegn clarament al spectrum politic burgheis, sesa dapi 2016 el cussegl da vischnaunca ed ha gia empruau avon quater onns da vegnir en suprastanza. El ha bein contonschiu lezza gada il pli absolut, ei denton curdaus ord elecziun sco candidat danvon.

La PLD ch'ei stada representada entochen avon quater onns en suprastanza cun *Angela Casanova* ch'ei stada biars onns ella politica, ei buc entrada uonn el cumbat electoral. Per tensiun electorala ei tuttina procurau ils 27 da settember damai che tschun candidatas ni candidats aspieschan per quater posts ella suprastanza communal.

Tradatou da *Martin Cabalzar*



Elecziuns cun tensiun: Il president communal *Erich Kohler*, ils suprastants recandidonts *Silvia Bisculm Jörg*, *Georg Ragaz*, *Armin Tanner* ed ils candidats novs *Nesina Ackermann-Gartmann* e *Daniel Meyer* (da sen.). FOTOS MAD